



SKUPŠTINA

198.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na 29. sjednici, održanoj 28.06.2016. godine, d o n o s i:

ZAKON O JAVNO-PRIVATNOM PARTNERSTVU

DIO PRVI – OPĆE ODREDBE

Član 1.

(Predmet Zakona)

- (1) Ovim zakonom propisuju se predmet, načela i obilježja javno-privatnog partnerstva (u daljnjem tekstu: JPP), modeli JPP-a, odobravanje projekata JPP-a i postupak odabira privatnog partnera, prava i obaveze javnih i privatnih partnera, nadzor nad njihovom realizacijom, te druga pitanja od značaja za javno-privatno partnerstvo iz nadležnosti Zeničko-dobojskog kantona (u daljnjem tekstu: Kanton) i jedinica lokalne samouprave (grad/općina, u daljnjem tekstu: JLS), sa područja Kantona.
- (2) Na pitanja koja nisu uređena ovim Zakonom, primjenjivat će se posebni zakoni, zavisno od javne usluge koja je predmet javno-privatnog partnerstva.

Član 2.

(Gramatička terminologija)

Gramatička terminologija korištenja muškog i ženskog roda za pojmove u ovom zakonu, podrazumjeva oba roda.

Član 3.

(Cilj Zakona)

Cilj ovog Zakona je da postavi jasan, nediskriminatoran i učinkovit pravni okvir za provedbu JPP projekata kojim će se kroz učešće privatnog sektora unaprjeđivati standard

javnih usluga iz nadležnosti Kantona i JLS sa područja Kantona, a ujedno i pospješiti uslovi za dalji ekonomski rast i razvoj na području Kantona i JLS sa područja Kantona.

Član 4.

(Osnovni pojmovi)

Pojedini pojmovi u smislu ovoga Zakona imaju sljedeća značenja:

- a) *Javno-privatno partnerstvo* je dugoročan ugovorni odnos između javnog i privatnog partnera sa ciljem pružanja javnih usluga iz nadležnosti javnog partnera korištenjem upravljačkih, tehničkih, finansijskih i inovacijskih sposobnosti privatnog partnera, kao i razmjenom umijeća i znanja između javnog i privatnog partnera, u skladu sa odredbama ovog Zakona.
- b) *Projekat JPP* je skup aktivnosti koji se pokreće, priprema, ugovara i provodi na način propisan ovim Zakonom.
- c) *Javni partner*, koji sa privatnim partnerom sklapa ugovor o JPP, je organ uprave i upravne organizacije Kantona i jedinica lokalne samouprave sa područja Kantona, javne ustanove i javna preduzeća čiji je osnivač i većinski vlasnik Kanton ili JLS, nadležan za pružanje predmetne javne usluge.
- d) *Privatni partner* je jedno ili više domaćih i/ili stranih pravno lice odabrano na osnovu provedenog postupka propisanog ovim Zakonom i koji s javnim partnerom sklapa ugovor o JPP-u.
- e) *Ugovor o JPP-u* je osnovni ugovor sklopljen između javnog i privatnog partnera kojim se u svrhu provedbe projekata JPP-a uređuju prava i obaveze ugovornih strana.
- f) *Konsultant* je jedna i/ili više fizičkih i/ili pravnih lica koja posjeduje specijalistička znanja nužna za pripremu, ugovaranje i provedbu projekata JPP-a.

Član 5.**(Predmet javno-privatnog partnerstva)**

- (1) Predmet JPP-a je istraživanje, projektovanje, izgradnja, rekonstrukcija, upravljanje i održavanje javnih resursa za zadovoljavanje javnih potreba iz nadležnosti javnog partnera.
- (2) Predmet JPP-a ne može biti isključivo istraživanje, građenje, isporuka robe i pružanje javne usluge, kao ni isključivo koncesija za korištenje općeg ili drugog dobra u svrhu privrednih aktivnosti.

Član 6.**(Osnovna obilježja JPP)**

Osnovna obilježja JPP-a su sljedeća:

- a) privatni partner od javnog partnera može preuzeti obavezu istraživanja i projektovanja, gradnje i/ili rekonstrukcije javne infrastrukture i/ili građevine od javnog interesa, preuzimajući pri tome obaveze kao što su finansiranje, upravljanje i održavanje, a u svrhu pružanja krajnjim korisnicima javne usluge iz nadležnosti javnog partnera, ili u svrhu osiguravanja javnom partneru potrebnih preduvjeta za pružanje javnih usluga iz njegovih nadležnosti;
- b) u svrhu realizacije ugovora o JPP, javni partner prenosi na privatnog partnera pravo građenja i/ili privatnom partneru dodjeljuje koncesiju i/ili privatnom partneru plaća naknadu u novcu.
- c) javni partner može, u skladu sa svrhom projekta JPP-a, dopustiti i obavljanje komercijalnih djelatnosti s ciljem naplate prihoda od trećih osoba na tržištu. Ako obavljanje komercijalnih djelatnosti nije ugovoreno, ono nije dopušteno.
- d) javni partner može prenijeti pravo građenja na privatnog partnera i bez plaćanja naknade, a sva pitanja vezana uz prijenos prava građenja, uključujući i visinu naknade, javni i privatni partner uređuju ugovorom o javno-privatnom partnerstvu.
- e) svaki od partnera preuzima odgovornost za rizike kojima može efikasnije upravljati ili je odgovornost podijeljena, što se mora precizno definisati Ugovorom o JPP-u.
- f) privatni partner od javnog partnera preuzima obavezu i rizike vezane uz finansiranje i proces gradnje, te najmanje jedan od dva ključna rizika: rizik raspoloživosti javne građevine ili rizik potražnje.
- g) ugovori o JPP ne mogu biti osnov za promjenu vlasništva na postojećim niti budućim javnim ili

općim dobrima odnosno javna imovina ostaje u javnom vlasništvu i nakon isteka ugovora o JPP.

Član 7.**(Načela)**

Javno-privatno partnerstvo provodi se u skladu sa načelima zaštite javnog interesa, jednakog tretmana (jednakopravnost), transparentnosti, konkurentnosti i ekonomičnosti.

Član 8.**(Modeli javno-privatnog partnerstva)**

Javno-privatno partnerstvo se u smislu ovog zakona provodi po jednom od sljedećih modela:

- a) **osnovni model** je model gdje je pravni osnov pravo građenja i po kojem se plaćanje naknade privatnom partneru u potpunosti ili većim dijelom vrši iz budžeta na osnovu raspoloživosti javne usluge prema ugovorenim standardima.
- b) **posebni model** je model gdje je pravni osnov koncesija i po kojem se plaćanje naknade privatnom partneru u potpunosti ili većim dijelom vrši od krajnjih korisnika, na osnovu korištenja javne usluge prema ugovorenim standardima.

Član 9.**(Nadležnost za projekte JPP)**

- (1) Postupak dodjele, provođenje i nadzora nad ugovorom JPP provodi javni partner iz člana 4. stav (1) tačka c) ovog zakona.
- (2) Izvještaj o nadzoru nad provođenjem ugovora o JPP za prethodnu kalendarsku godinu, javni partner dostavlja Ministarstvu za privredu, za potrebe vođenja Registra i pripreme godišnjih izvještaja o provedbi Zakona, najkasnije do 30. marta.

DIO DRUGI – DODJELA UGOVORA O JAVNO-PRIVATNOM PARTNERSTVU**Član 10.****(Postupak dodjele ugovora JPP-a)**

Postupak dodjele ugovora JPP sastoji se iz sljedećih faza:

- a) Identifikacija projekta JPP
- b) Priprema prijedloga projekta JPP
- c) Odabir privatnog partnera
- d) Ugovaranje JPP

Član 11.**(Identifikacija projekata JPP)**

- (1) Javni partner dužan je izraditi srednjoročni (trogodišnji) i godišnji plan potencijalnih projekata JPP-a na način propisan ovim Zakonom.
- (2) Srednjoročni plan navodi prioritetne javne usluge koje će se unapređivati u planskom periodu, potrebna sredstva za provođenje plana, očekivane rezultate u smislu doprinosa implementaciji strateško-planskog dokumenta, procjenu rizika i tabelarni pregled potencijalnih projekata (naziv, kratki opis projekta, svrha i cilj projekta, procjenjena vrijednost projekta i očekivani model JPP).
- (3) Godišnji plan mora biti u skladu sa srednjoročnim planom i sadrži:
 - a. tabelarni pregled projekata JPP na kojima će se raditi u planskom periodu, (naziv i kratki opis projekta, svrha i cilj projekta, procjenjena vrijednost projekta i očekivani model JPP)
 - b. kratki opisi projekata JPP u formularu propisanom podzakonskim aktom
 - c. planirana budžetska sredstva za implementaciju plana razvrstana po aktivnostima
- (4) Godišnji plan projekata JPP priprema se, usvaja i objavljuje uporedo sa budžetom javnog tijela.
- (5) Javni partner dužan je po usvajanju planova iz stava (1) ovog člana iste objaviti na svojoj web-stranici i dostaviti Ministarstvu za privredu, nadležnom za provođenje upravnog nadzora.
- (6) Identifikacija potencijalnih projekata JPP vrši se u skladu sa strateško-planskim dokumentom javnog partnera i kriterijima iz podzakonskog akta.
- (7) Vlada Kantona će donijeti Uredbu kojom će bliže urediti sadržaj formulara na kome se podnosi kratak opis projekta JPP, postupak i kriterije za izbor radnog tijela i konsultanta, minimalni sadržaj studije opravdanosti, dodatni sadržaj ugovora o JPP, način registracije ugovora o JPP-u i dr. pitanja koja se odnose na primjenu ovog Zakona.

Član 12.**(Priprema prijedloga projekta JPP)**

- (1) Priprema prijedloga projekta JPP obuhvata:
 - a) Uspostavljanje radnog tijela;
 - b) Izrada dinamičkog plana rada;
 - c) Opis projekta;

- d) Priprema idejnog rješenja i/ili idejnog projekta, zavisno od složenosti projekta;
- e) Priprema studije opravdanosti;
- f) Donošenje konačne odluke o projektu (prihvatanje ili odbijanje).

- (2) Javni partner podnosi prijedlog projekta, (opis projekta i studiju opravdanosti), nadležnom tijelu za donošenje Odluke o opredjeljenosti za uspostavljanje JPP.
- (3) Javni partner dostavlja Odluku o opredjeljenosti za uspostavljanje JPP Ministarstvu za privredu u roku od sedam dana od dana donošenja.

Član 13.**(Radno tijelo za pripremu prijedloga projekta JPP)**

- (1) Javni partner za svaki projekat JPP formira radno tijelo za pripremu projekta JPP i provođenje postupka dodjele ugovora JPP.
- (2) Radno tijelo iz stava (1) ovog člana za projekte JPP iz nadležnosti Kantona imenuje Vlada Kantona, a za projekte JPP iz nadležnosti JLS imenuje gradonačelnik odnosno načelnik JLS.
- (3) Javni partner u radno tijelo može imenovati konsultanta iz člana 4. stav (1) tačka f) ovog zakona, koji ne smije biti u sukobu interesa u odnosu na privatnog partnera.
- (4) Postupak i kriterije za izbor članova radnog tijela i konsultanata, njihova prava i obaveze, sadržani su u Uredbi iz člana 11. stav (7), koju donosi Vlada Kantona.

Član 14.**(Dinamički plan rada)**

Radno tijelo priprema dinamički plan za pripremu prijedloga projekta JPP prema obrascu čiji je sadržaj i forma propisan Uredbom iz člana 11. stav (7).

Član 15.**(Opis projekta)**

Radno tijelo priprema opis projekta JPP prema obrascu čiji je sadržaj i forma propisan Uredbom iz člana 11. stav (7).

Član 16.**(Idejno rješenje i/ili idejni projekat)**

Idejno rješenje i idejni projekat se pripremaju u skladu sa zakonom.

Član 17.**(Studija opravdanosti)**

- (1) Javni partner priprema studiju opravdanosti čiji je minimalni sadržaj propisan Uredbom iz člana 11. stav (7).
- (2) Javni partner priprema studiju opravdanosti samostalno ili uz pomoć konsultanta, u zavisnosti od raspoloživih kapaciteta javnog partnera.
- (3) Izbor konsultanta javni partner vrši na osnovu javnog poziva.
- (4) Kriteriji i postupak za izbor konsultanta propisani su Uredbom iz člana 11. stav (7).

Član 18.**(Učešće privatnog sektora u pripremi prijedloga projekta)**

- (1) Po objavljivanju srednjoročnog i godišnjeg plana projekata JPP, javni partner može na pismeni zahtjev zainteresovanog privatnog partnera odobriti da privatni partner pripremi dio prijedloga određenog projekta JPP (idejni projekat i studiju opravdanosti) na način propisan ovim zakonom i Uredbom iz člana 11. stav (7).
- (2) Ukoliko nakon provedenog javnog postupka odabira privatnog partnera, zainteresovani privatni partner iz stava (1) ovog člana ne bude izabran, ima pravo na povrat uložених sredstava od strane odabranog privatnog partnera na ime otkupa projektne dokumentacije.
- (3) Uzajamna prava i obaveze, kao i cijena projektne dokumentacije iz stava (1) i (2) ovog člana, regulišu se ugovorom između javnog partnera i zainteresovanog privatnog partnera.
- (4) U slučaju da interes za pripremom određenog projektne prijedloga iskaže više privatnih partnera, prednost za sklapanje ugovora iz stava (3) ovog člana biti će data privatnom partneru koji prvi podnese zahtjev iz stava (1) ovog člana.

Član 19.**(Odabir privatnog partnera)**

- (1) Javni partner donosi Odluku o izboru privatnog partnera na osnovu javnog poziva.
- (2) Kriteriji i postupak izbora privatnog partnera propisani su Uredbom iz člana 11. stav (7).

- (3) Javni partner dostavlja Odluku o izboru privatnog partnera Ministarstvu za privredu Kantona najkasnije sedam (7) dana od dana donošenja.

Član 20.**(Ugovoranje JPP)**

- (1) Javni partner po potrebi, zavisno od vrste projekta, dopunjava sastav radnog tijela iz člana 13., stav (1) resursima neophodnim za provođenje postupka ugovaranja JPP.
- (2) Postupak ugovaranja JPP sa izabranim privatnim partnerom vrši se u tri faze:
 - a) priprema nacrtu ugovora JPP
 - b) pregovaranje o elementima iz nacrtu ugovora o JPP
 - c) sklapanje ugovora o JPP

Član 21.**(Nacrt ugovora o JPP)**

- (1) Nacrt ugovora o JPP radno tijelo priprema na osnovu prijedloga projekta JPP iz člana 12. ovog zakona.
- (2) Nacrt ugovora o JPP obavezno sadrži sljedeće elemente:
 - a) Uvod,
 - b) Ugovorne strane,
 - c) Definicija pojmova,
 - d) Svrha i predmet ugovora odnosno postavljeni standard javne usluge,
 - e) Vrijeme na koje je ugovor sklopljen,
 - f) Imovinske obaveze i prava ugovornih strana,
 - g) Podjela rizika i pripadajućih troškova između ugovornih strana,
 - h) Finansiranje projekta,
 - i) Plaćanje ugovornih strana,
 - j) Finansijske garancije za izvršenje ugovora,
 - k) Finansijske garancije za izvršenje obaveza podugovarača,
 - l) Događaji koji mogu prouzrokovati štetu i način postupanja ugovornih strana u slučaju njihovog nastanka, uključujući i višu silu,
 - m) Zatezne kamate,
 - n) Police osiguranja,
 - o) Posljedica neispunjenja ugovornih obaveza,

- p) Pravo nadzora od strane javnog partnera,
- r) Naknadna nemogućnost neispunjenja ugovora,
- s) Postupak i uslovi preuzimanja građevine ako ugovor o JPP obuhvata izgradnju građevina,
- t) Prestanak ugovora,
- u) Raskid ugovora i posljedice raskida ugovora,
- v) Zaštita okoliša,
- z) Način slanja obavijesti tokom ugovornog perioda,
- aa) Zaštita intelektualnog vlasništva, poslovna tajna i tajnost podataka,
- ab) Podugovaranje,
- ac) Rješavanje sporova proizašlih iz ugovora,
- ad) Salvatorna odredba,
- ae) Stupanje ugovora na snagu,
- af) Druga prava, obaveze i odgovornosti ugovornih strana.

(3) Dodatni sadržaj ugovora o JPP propisan je Uredbom iz člana 11. stav (7).

(4) Na sva pitanja koja nisu regulisana u stavu (2) ovog člana primjenjuju se odredbe Zakona o obligacionim odnosima.

Član 22.

(Pregovaranje o elementima nacrtu ugovora o JPP)

- (1) Javni partner je u roku od 15 dana od dana donošenja pravosnažne Odluke o izboru privatnog partnera obavezan dostaviti nacrt ugovora o JPP izabranom privatnom partneru.
- (2) Privatni partner je dužan u roku od 30 dana od dana prijema nacrtu ugovora o JPP pismeno se izjasniti o dostavljenom nacrtu ugovora o JPP.
- (3) Ugovorne strane mogu, u zavisnosti od sadržaja odgovora privatnog partnera, nastaviti pregovaranje do konačnog usaglašavanja volje obiju strana.
- (4) Postupak pregovaranja iz stava (3) ovog člana ne može trajati duže od 60 dana od dana prijema.
- (5) U slučaju neuspješnog postupka pregovaranja sa izabranim privatnim partnerom, javni partner dostavlja nacrt ugovora o JPP iz člana 21. sljedeće rangiranom privatnom partneru.

Član 23.

(Sklapanje ugovora o JPP-u)

- (1) Konačni tekst ugovora o JPP i svakog naknadno potpisanog aneksa ugovora javni partner dostavlja na mišljenje nadležnom Pravobranilaštvu.
- (2) Javni partner dužan je registrovati ugovor o JPP i svaki aneks na ugovor u roku od tri (3) dana od dana potpisivanja na način propisan Uredbom iz člana 11. stav (7).

DIO TREĆI – PROVOĐENJE ZAKONA

Član 24.

(Poslovi na provođenju Zakona)

Ministarstvo za privredu, zaduženo za provođenje ovog Zakona, vrši sljedeće poslove:

- a) priprema i podnosi Vladi godišnji plan aktivnosti za provedbu Zakona,
- b) priprema i podnosi godišnje izvještaje o provedbi Zakona,
- c) ustrojava i vodi javni Registar, i obezbjeđuje da Registar bude javno dostupan,
- d) priprema i daje stručna mišljenja o pojedinim pitanjima iz ovoga Zakona i propisa donesenih na osnovu ovog Zakona,
- e) daje mišljenje o osnovanosti inicijativa za izmjene i dopune ovoga Zakona i drugih propisa o javno-privatnom partnerstvu,
- f) u saradnji s drugim nadležnim tijelima organizira specijalističke programe edukacije za javna tijela i druge učesnike,
- g) saraduje s naučnim i istraživačkim institucijama, socijalnim partnerima, privrednim i nevladinim udruženjima i drugim zainteresiranim stranama u svrhu unapređivanja primjene Zakona,
- h) promovira i izučava primjenu najbolje prakse JPP-a, te u svom domenu saraduje s inozemnim nacionalnim tijelima i međunarodnim organizacijama i institucijama ovlaštenim za JPP,
- i) obavlja i druge poslove u skladu sa odredbama ovog Zakona.

Član 25.

(Sredstva za provođenje Zakona)

Sredstva za provođenje poslova iz člana 24. osiguravaju se u budžetu Kantona na posebnoj budžetskoj poziciji u okviru Ministarstva za privredu, u skladu sa planom budžeta za tekuću godinu.

DIO ČETVRTI - PRAVNA ZAŠTITA**Član 26.****(Pravna zaštita u postupku izbora privatnog partnera)**

- (1) Na odluku o izboru privatnog partnera može se izjaviti žalba u roku od 15 dana od dana prijema odluke.
- (2) Žalba se izjavljuje Ministarstvu za privredu za projekte JPP iz nadležnosti JLS, a za projekte JPP iz nadležnosti Kantona drugostepenoj komisiji Vlade.
- (3) Žalbeni postupak provodi se u skladu sa Zakonom o upravnom postupku.

Član 27.**(Spor o nadležnosti)**

U slučaju sukoba nadležnosti vezano za projekte JPP-a između javnih tijela, primjenjivat će se odredbe Zakona o upravnom postupku.

DIO PETI - KAZNE NE ODREDBE**Član 28.****(Pokretanje prekršajnog postupka)**

Ako Ministarstvo za privredu Kantona i/ili drugo nadležno javno tijelo utvrdi da je došlo do povrede odredbi ovog Zakona od strane javnog ili privatnog partnera, podnosi sudu nadležnom za prekršaje prijedlog za pokretanje prekršajnog postupka.

Član 29.**(Novčane kazne)**

- (1) Novčanom kaznom od 5.000,00 do 15.000,00 konvertibilnih maraka (KM) kaznit će se za prekršaj javni partner ako:
 - a) ne provodi postupak pripreme i ugovaranja JPP projekta na način propisan članovima 10.-23. ovog Zakona i Uredbom iz člana 11. stav (7);
 - b) ne dostavi ili ne dostavi u propisanom roku ili na propisani način dokumente iz člana 9. stav (2), člana 11. stav (4), člana 12. stav (3), člana 19. stav (3), člana 22. stav (1) i člana 23. stav (2).
- (2) Novčanom kaznom od 5.000,00 do 15.000,00 konvertibilnih maraka (KM) kaznit će se za prekršaj privatni partner ako ne dostavi ili ne dostavi u propisanom roku ili na propisani način dokument iz člana 22. stav (2).
- (3) Novčanom kaznom od 1.000,00 do 3.000,00 KM kaznit će se odgovorna osoba javnog odnosno

privatnog partnera za prekršaje iz stava (1) i stava (2) ovog člana.

Član 30.**(Antikorupcija)**

Postupci javnog odnosno privatnog partnera za vrijeme pripreme, ugovaranja i/ili implementacije JPP projekta, a koji imaju obilježja krivične odgovornosti, a naročito zloupotreba položaja, te primanje i davanje mita, istraživat će se i procesuirati u skladu sa zakonom.

DIO ŠESTI - PRELAZNE I ZAVRŠNE ODREDBE**Član 31.****(Donošenje podzakonskih i drugih pravnih akata)**

- (1) Vlada i Skupština Kantona će, na prijedlog Ministarstva za privredu, najkasnije u roku od 30 dana od dana stupanja na snagu ovog Zakona, donijeti odluke koje će omogućiti funkcionisanje Ministarstva za privredu u skladu sa odredbama člana 25. ovog Zakona.
- (2) Vlada će, na prijedlog Ministarstva za privredu, najkasnije u roku od 30 dana od dana donošenja odluka iz stava (1) ovog člana odnosno 90 dana od dana stupanja na snagu ovog Zakona, donijeti Uredbu iz člana 11. stav (7) Zakona o javno-privatnom partnerstvu Zeničko-dobojskog kantona.
- (3) Sva javna tijela sa područja Kantona odnosno organi uprave i upravne organizacije Kantona i JLS sa područja Kantona, javne ustanove i javna preduzeća čiji je osnivač i većinski vlasnik Kanton ili JLS, dužna su u roku od 60 dana od dana donošenja Uredbe iz stava (2) ovog člana postupiti u skladu sa odredbama člana 11. ovog Zakona.
- (4) Odredba iz stava (3) ovog člana obavezujuća je i za javna tijela koja ne planiraju pokretati projekte JPP u naredne tri godine.
- (5) Pravilnik o ustrojstvu i vođenju registra iz člana 24. ovog Zakona donijet će Ministarstvo u roku od 30 dana od dana stupanja na snagu ovog Zakona.

Član 32.**(Primjena zakona na postupke koji nisu pravosnažno okončani)**

Svi postupci koji do dana stupanja na snagu ovog zakona nisu pravosnažno okončani, završit će se po odredbama zakona koji je bio na snazi u vrijeme pokretanja postupka.

Član 33.
(Prestanak primjene)

Danom stupanja na snagu ovog Zakona, stavlja se van snage Zakon o javno-privatnom partnerstvu („Službene novine Zeničko-dobojskog kantona broj 5/13).

Član 34.
(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-12203/16
Datum, 28.06.2016. godine
Z e n i c a

PREDSJEDAVALA
Draženka Subašić, s.r.

199.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 29. sjednici, održanoj 28.06.2016. godine, d o n o s i:

ZAKON
O IZMJENI ZAKONA O
JAVNOJ USTANOVI UNIVERZITET U ZENICI

Član 1.
(Izmjena člana 6. – Organizacione jedinice
Univerziteta u Zenici)

U Zakonu o Javnoj ustanovi Univerzitet u Zenici („Službene novine Zeničko-dobojskog kantona“, broj: 6/05, 11/06, 6/09, 10/11, 16/11, 15/12 i 13/13), u članu 6., stav 1., alineja 7., riječ: „Zdravstveni“ zamjenjuje se riječju: „Medicinski“.

Član 2.
(Stupanje na snagu)

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-12204/16
Datum, 28.06.2016. godine
Z e n i c a

PREDSJEDAVALA
Draženka Subašić, s.r.

200.

Na osnovu člana 37. stav 1. tačka f) Ustava Zeničko-dobojskog kantona, a u vezi sa članom 25. Zakona o visokom obrazovanju („Službene novine Zeničko-dobojskog kantona“, broj: 6/09, 9/13, 13/13 i 4/15), Skupština Zeničko-dobojskog kantona, na 29. sjednici, održanoj 28.06.2016. godine, d o n o s i:

ODLUKU
o usvajanju Elaborata o društveno-ekonomskoj
opravdanosti studijskog programa Lokalni ekonomski
razvoj i politika, drugog ciklusa studija, na
Ekonomskom fakultetu
Univerziteta u Zenici

Član 1.

Usvaja se Elaborat o društveno-ekonomskoj opravdanosti studijskog programa Lokalni ekonomski razvoj i politika, drugog ciklusa studija, na Ekonomskom fakultetu Univerziteta u Zenici.

Član 2.

Odluka stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 01-38-12205/16
Datum, 28.06.2016. godine
Z e n i c a

PREDSJEDAVALA
Draženka Subašić, s.r.

201.

Na osnovu člana 37. stav 1. tačka f) Ustava Zeničko-dobojskog kantona, a u vezi sa članom 25. Zakona o visokom obrazovanju („Službene novine Zeničko-dobojskog kantona“, broj: 6/09, 9/13, 13/13 i 4/15), Skupština Zeničko-dobojskog kantona, na 29. sjednici, održanoj 28.06.2016. godine, d o n o s i: